

1. Bebankan majikan, pembayar cukai

KUALA LUMPUR 3 Jun - Keputusan Lembaga Hasil Dalam Negeri (LHDN) melaksanakan arahan potongan gaji (Arahan CP38) perlu diperhalusi dengan mengambil kira pelbagai aspek, kata Setiausaha Agung Kesatuan Pekerja-pekerja Pengangkutan Semenanjung Malaysia (TWU), Tan Sri Zainal Rampak.

Beliau berkata, badan yang bertanggungjawab dalam pengutipan cukai itu perlu meneliti pelbagai aspek terutama kemampuan pembayar cukai untuk menyelesaikan tunggakan cukai serta mengambil pendekatan lain yang lebih komprehensif.

"Langkah mengeluarkan arahan pemotongan gaji tersebut bukanlah satu tindakan bijak sebaliknya akan menambah beban majikan dan pekerja.

"LHDN disaran menggunakan saluran yang lebih berkesan iaitu menerusi tindakan undang-undang kepada pembayar yang ingkar kerana menerusi langkah ini akan memberikan pengajaran kepada mereka," katanya ketika dihubungi Utusan Malaysia di sini hari ini.

Beliau mengulas kenyataan LHDN semalam berhubung Arahan CP38 kepada para majikan untuk membuat potongan tambahan secara ansuran bulanan terhadap gaji pembayar bertujuan melunaskan tunggakan cukai yang masih ada, bermula 16 Jun ini.

Mengikut rekod LHDN, sehingga 24 Mei lalu, dianggarkan 156,158 orang pembayar cukai individu akan menerima Arahan CP38 berkenaan melibatkan amaun tunggakan cukai berjumlah hampir RM418 juta.

Sementara itu, Presiden Kesatuan Pekerja-pekerja Proton Tanjung Malim Sdn. Bhd., Zainudin Dollah berkata, tindakan 'mengejut' LHDN dalam mengambil tindakan pemotongan gaji terhadap pekerja yang mempunyai tunggakan cukai adalah tidak munasabah.

Katanya, tempoh masa kurang dari sebulan yang diberikan akan membebankan pembayar itu sendiri dan merupakan satu tindakan tidak adil.

"LHDN sepatutnya memberikan ruang kepada pembayar yang masih mempunyai tunggakan cukai untuk merujuk kepada organisasi tersebut untuk perbincangan seterusnya.

"Adalah lebih baik pembayar diberikan kesempatan untuk menjelaskan tunggakan mereka secara ansuran mengikut kemampuan mereka sendiri berbandingan penegasan seperti Arahan CP38," katanya.

2. RM8j bangun sektor pertanian - MB

JERLUN 3 Jun - Kerajaan negeri memperuntukkan hampir RM8 juta untuk membangunkan sektor pertanian di negeri ini yang memberi tumpuan kepada peningkatan hasil pertanian terutamanya padi dan mewujudkan lebih ramai usahawan tani.

Menteri Besar, Datuk Seri Mukhriz Tun Dr. Mahathir berkata, peruntukan tersebut yang diumumkan dalam Bajet 2014 membuktikan kesungguhan kerajaan negeri untuk membangunkan potensi sektor pertanian bagi melonjak pertumbuhan ekonomi negeri.

Katanya, pelbagai faedah serta inisiatif diwujudkan bagi membantu petani-petani di negeri ini melalui jabatan-jabatan serta agensi berkaitan.

"Program Transformasi Negeri Kedah yang dilancarkan tidak lama dahulu berperanan sebagai pemangkin kepada usaha-usaha untuk merealisasikan aspirasi tersebut.

"Kerajaan negeri akan sentiasa memastikan hala tuju sektor pertanian yang selama ini dilihat sebagai sektor kurang diminati kerana pulangan hasil yang rendah, dilonjak menjadi sektor berpendapatan tinggi, berdaya maju serta memberi pulangan yang lumayan kepada pengusahanya," katanya di majlis perasmian Road To MAHA peringkat negeri di Pusat Pertumbuhan Desa, Sungai Korok, Alor Biak, Ayer Hitam dekat sini baru-baru ini.

Teks ucapan beliau dibacakan oleh Pengurus Jawatankuasa Industri dan Pelaburan Kedah, Datuk Dr. Ku Abd. Rahman Ku Ismail.

Berucap lanjut kata Mukhriz, melalui Makmal Transformasi Kedah kerajaan negeri telah mengenalpasti beberapa masalah iaitu kawasan tanah terbiar luar kawasan Lembaga Kemajuan Pertanian Muda (MADA) seluas 8,619 hektar dan kekangan-kekangan dari segi teknologi serta pemasaran luar negara.

"Setelah masalah ini dikenal pasti, maka kerajaan negeri telah merangka transformasi pertanian untuk membantu petani-petani.

"Antara transformasi pertanian yang akan kerajaan negeri jalankan ialah memperkenalkan industri biji benih serta kaedah penanaman padi yang kurang menggunakan air serta racun, di samping membangunkan kawasan tanah terbiar dan aktiviti pertanian berskala besar iaitu berkonsep estet dan koperasi serta memperkenalkan padi organik," katanya.

Tambah beliau, kerajaan negeri juga berhasrat menyumbang sehingga 60 peratus kepada hasil pengeluaran padi negara menjelang tahun 2020 berbanding kira-kira 35 peratus ketika ini.

"Antara projek yang membantu meningkatkan hasil pengeluaran padi ialah menerusi Bidang Ekonomi Utama Negara (NKEA) Projek Permulaan (EPP) 10.

"Program pemerkasaan sektor pertanian yang dirancang oleh kerajaan negeri turut disokong oleh Kerajaan Persekutuan yang telah meluluskan peruntukan sebanyak RM2.2 bilion untuk projek penambahbaikan pengairan dan saliran kawasan MADA," katanya.

Tambahnya, selain itu, MADA diberi peruntukan sebanyak RM500 juta bagi meningkatkan jumlah kawasan sawah persendirian dijadikan estet padi pada kadar 5,000 hektar setahun secara berperingkat-peringkat sehingga menjelang 2020.



Isnin, 9 Jun 2014

3. Klinik Kesihatan Gombak Setia semakin sesak

KUALA LUMPUR 8 Jun - Penduduk meminta supaya pembinaan bangunan tambahan di Klinik Kesihatan Gombak Setia di sini, yang sepatutnya bermula awal tahun ini dan dijangka siap penghujung 2016 disegerakan.

Menurut Pengurus Panel Penasihat Pejabat Kesihatan Gombak, Latiff Salim, 76, pihak Kementerian Kerja Raya telah meluluskan peruntukan berjumlah RM15 juta bagi membina bangunan tambahan klinik itu baru-baru ini.

Bagaimanapun, dakwanya, permohonan menghasilkan pelan bangunan tambahan dari Jabatan Kerja Raya bagi menampung bilangan pesakit yang semakin bertambah di klinik itu belum disiapkan.

"Kami telah menghantar permohonan itu baru-baru ini, tetapi pihak yang terbabit memberitahu pelan itu hanya boleh disiapkan sekurang-kurangnya dalam masa setahun.

"Kami merayu agar permohonan itu dipercepatkan memandangkan Kementerian Kesihatan telah meluluskan bajet RM15 juta membabitkan sebidang tanah dengan keluasan 0.318 hektar bagi tujuan itu.

"Tapak bangunan baharu bersebelahan Klinik Kesihatan Gombak Setia yang kini dijadikan kuarters kakitangan klinik telah usang dan terbiar," katanya kepada Utusan Malaysia ketika ditemui di sini, baru-baru ini.

Mengulas lanjut Latiff menjelaskan, pembinaan bangunan baharu itu perlu dilakukan segera memandangkan dua bangunan sedia ada tidak mampu menampung jumlah pesakit yang semakin bertambah sejak akhir-akhir ini.

Katanya, salah sebuah bangunan itu merupakan klinik untuk ibu mengandung dan kanak-kanak manakala sebuah lagi klinik umum yang dikunjungi kira-kira 300 pesakit setiap hari.

"Dianggarkan jumlah kepadatan penduduk di sini ialah kira-kira 100,000 orang. Ini termasuk warga asing dari Indonesia dan Afrika yang turut datang ke klinik ini."

"Sehubungan itu, jumlah kakitangan dan kemudahan yang ada tidak mampu menampung bilangan pesakit yang meningkat setiap tahun," katanya.



Rabu, 11 Jun 2014

4. 20,434 penjawat awam dikenakan tindakan

KUALA LUMPUR 10 Jun - Seramai 20,434 penjawat awam telah dikenakan tindakan tatatertib bagi tempoh 2009 hingga 2013.

Menteri di Jabatan Perdana Menteri, Datuk Seri Shahidan Kassim berkata, daripada jumlah itu, seramai 4,743 orang telah dibuang kerja manakala 125 orang diturunkan pangkat dan tidak akan dipertimbangkan kenaikan pangkat bagi tempoh 48 bulan.

Jelasnya, selain itu, seramai 963 orang lagi diturunkan gaji dan tidak akan dipertimbangkan kenaikan pangkat bagi tempoh 36 bulan serta 2,048 orang ditangguhkan pergerakan gaji dan tidak akan dipertimbangkan kenaikan pangkat bagi tempoh 30 bulan.

"Seramai 3,491 penjawat awam telah dilucutkan hak emolumen dan tidak akan dipertimbangkan kenaikan pangkat bagi tempoh 24 bulan serta 3,373 dikenakan denda maksimum tujuh hari emolumen dan tidak akan dipertimbangkan kenaikan pangkat bagi tempoh 18 bulan.

"Sementara itu, seramai 10,531 orang diberi amaran dan tidak akan dipertimbangkan kenaikan pangkat bagi tempoh 12 bulan," katanya menjawab soalan Datuk Johari Abdul (PKR-Sungai Petani) pada sidang Dewan Rakyat di sini hari ini.

Shahidan menambah, kesemua penjawat awam yang dikenakan tindakan itu adalah daripada perkhidmatan awam Persekutuan, perkhidmatan awam negeri, pihak berkuasa berkanun Persekutuan dan pihak berkuasa tempatan (PBT).

Jelasnya, jumlah tersebut mengambil kira seseorang penjawat awam juga boleh dikenakan lebih daripada satu hukuman tatatertib apabila didapati bersalah.

5. 30 lagi sistem siren amaran tsunami

KUALA TERENGGANU 14 Jun - Kementerian Sains, Teknologi dan Inovasi (MOSTI) akan menambah 30 lagi rangkaian sistem siren tsunami di lokasi-lokasi strategik di seluruh negara yang melibatkan kos keseluruhan kira-kira RM6 juta.

Ketua Setiausaha kementerian, Datuk Dr. Rosli Mohamed berkata, penyediaan sistem itu sebagai tambahan kepada 23 sistem siren tsunami sedia ada di seluruh negara yang berfungsi memberi amaran tsunami kepada orang ramai.

Selain sistem siren, kerajaan juga akan menambah 12 buah stesen seismik strong motion dan lapan stesen seismik weak motion di seluruh negara.

Pada masa ini terdapat 15 buah stesen seismik strong motion manakala 17 buah stesen seismik weak motion di seluruh negara," katanya.

Beliau berkata demikian selepas majlis perasmian program Latih Amal Tsunami Peringkat Terengganu 2014 di Seberang Takir di sini hari ini yang disempurnakan oleh Setiausaha Politik kepada Menteri Besar, Rosdi Muda.

Yang turut hadir, Ketua Pengarah Jabatan Meteorologi, Datuk Che Gayah Ismail dan Setiausaha Keselamatan Negeri Majlis Keselamatan Negara (MKN), Mohd. Sarif Hassan.

Rosli berkata, penempatan sistem amaran awal tsunami itu kebanyakannya tertumpu di lokasi-lokasi yang berisiko dilanda bencana itu terutama di Sabah.

Menerusi sistem tersebut dapat membantu mengesan gempa bumi dan tsunami selain membuat anggaran ketinggian ombak dan tempoh akan sampai ke kawasan pantai untuk langkah keselamatan," ujarnya.

Di samping itu katanya, pihaknya turut menyediakan kaedah penyebaran amaran awal tsunami menerusi Sistem Amaran Talian Tetap menggunakan talian tetap telefon dengan kerjasama Telekom Malaysia (TM).

Jelas beliau, sistem dalam talian itu yang disediakan sejak 2005 adalah bagi kegunaan pelanggan yang berada dalam lingkungan tiga kilometer dari pantai.

Mengenai program Latih Amal Tsunami, katanya, kerjasama semua pihak terutama jabatan-jabatan kerajaan yang berkaitan amat penting bagi menyelaraskan langkah keselamatan awal sekiranya berlaku gempa bumi dan tsunami.

Selasa, 17 Jun 2014

6. 80 penjawat awam ditahan terlibat rasuah lima bulan pertama 2014

MELAKA 17 Jun - Sebanyak 80 penjawat awam ditahan Suruhanjaya Pencegahan Rasuah Malaysia (SPRM) kerana terlibat dalam pelbagai kesalahan rasuah bagi tempoh lima bulan pertama tahun ini.

Menurut laman web rasmi SPM, jumlah itu menunjukkan peningkatan berbanding 65 tangkapan dalam tempoh sama tahun lepas.

Kumpulan sokongan merupakan golongan yang paling ramai ditahan iaitu 67 orang diikuti kumpulan pengurusan dan profesional sebanyak 13 orang.

Tiada penjawat awam daripada kumpulan pengurusan tertinggi ditahan, menurut laman web berkenaan.

Dalam tempoh sama, SPM juga menahan 127 orang awam dengan 36 orang daripadanya merupakan pekerja sektor swasta. - BERNAMA

Rabu, 18 Jun 2014

7. Penguatkuasaan tidak berkesan punca ramai remaja merokok - Khairy

SEREMBAN 17 Jun - Lambakan rokok seludup yang mudah dibeli oleh remaja bersekolah dari usia 15 hingga 18 tahun mencetuskan kebimbangan besar dalam kalangan masyarakat.

Semuanya berpunca daripada kelemahan penguatkuasaan apabila beberapa kedai yang tidak mempunyai lesen sama ada di bandar maupun luar bandar dengan mudah mendapat bekalan rokok seludup dan kemudiannya dijual dengan harga murah, sekali gus mempengaruhi remaja untuk merokok.

Menteri Belia dan Sukan, Khairy Jamaluddin berkata, trend tidak sihat itu cukup membimbangkan dan apa yang perlu dilakukan ketika ini adalah dengan memperketatkan lagi penguatkuasaan bagi menghalang situasi berkenaan dari terus berlaku.

Katanya, apabila rokok dijual dengan harga murah dan mudah didapati, pastinya ia akan mendorong lebih ramai remaja untuk merokok.

"Penjualan rokok di kedai perlu diperketatkan supaya tidak dijual kepada remaja di bawah umur. Sebab kita tahu ada beberapa kedai dan warung yang tidak kisah langsung soal penjualan rokok kepada mereka yang di bawah umur.

"Keduanya dari segi penguatkuasaan dari segi pemberantasan rokok seludup sebab sehingga kini ia menjadi masalah dan saya difahamkan kerajaan mengalami kerugian berbilion ringgit akibat kegiatan penyeludupan ini," katanya.

Beliau berkata demikian ketika merasmikan Karnival Kerjaya di Universiti Nilai dekat sini hari ini.

Yang turut hadir Naib Canselornya, Prof. Datuk Megat Burhanuddin Megat Ab. Rahman dan Ketua Pegawai Eksekutif Talent Corporation Malaysia Berhad (Talent Corp), Johan Mahmood Merican.

Khairy melahirkan kebimbangan itu selepas Kementerian Kesihatan mendedahkan semalam bahawa terdapat sekitar 500,000 remaja yang merokok di Malaysia, dengan membelanjakan jutaan ringgit membeli rokok setiap hari.

Jelas beliau, pihak kementerian boleh menjalankan sebarang aktiviti kesedaran terhadap bahaya merokok dalam kalangan remaja, namun tanpa penguatkuasaan yang berkesan sudah pastinya usaha menghindarkan remaja dari gejala tidak bermanfaat itu tidak membawa kepada sebarang perubahan.

Malah, katanya, Malaysia boleh dikategorikan sebagai negara yang lemah dalam aspek tahap penjagaan kesihatan dan ia dibuktikan menerusi kadar penyakit diabetis dan hipertensi tertinggi di rantau Asia.



Rabu, 18 Jun 2014

8. Rokok seludup: Kerajaan rugi RM2b

KOTA BHARU 17 Jun - Kelantan adalah negeri ketiga tertinggi pasaran rokok seludup di negara ini selepas Selangor dan Johor.

Pengarah Kastam negeri, Datuk Azis Yacob berkata, negeri ini menyumbang sebanyak tiga peratus daripada 35 peratus secara keseluruhannya pasaran rokok seludup di seluruh negara.

Beliau berkata, Selangor dan Johor masing-masing menyumbang sebanyak 7.7 peratus dan 3.5 peratus pasaran rokok berkenaan.

"Penyeludupan rokok di negara ini amat kritikal di mana 35 peratus daripada rokok yang dijual di pasaran adalah rokok seludup dan Kelantan merupakan penyumbang ketiga ter-tinggi pasaran rokok tidak sah ini.

"Akibat daripada aktiviti penyeludupan rokok yang berleluasa itu turut menyebabkan kerajaan mengalami kerugian dianggarkan sebanyak RM2 bilion setahun," katanya.

Beliau berkata demikian kepada pemberita selepas mempengerusikan Mesyuarat Jawatankuasa Bertindak Bersama Mencegah Penyeludupan Rokok Zon Pantai Timur di sini semalam.

Mesyuarat tahunan itu telah melibatkan beberapa agensi penguatkuasaan seperti polis, Agensi Penguatkuasaan Maritim Malaysia (APMM), Jabatan Sukarelawan Malaysia (Rela), Unit Pencegah Penyeludupan (UPP) dan beberapa lagi agensi-agensi berkaitan.

Azis berkata, kastam akan terus menjalankan kerjasama dengan agensi-agensi penguatkuasaan ini bagi membanteras aktiviti penyeludupan rokok tiruan khususnya di negeri-negeri Pantai Timur.

"Kami (penguatkuasaan) akan terus bersatu mencari jalan mengawal sempadan dan pengairan negara bagi membanteras aktiviti penyeludupan rokok tiruan ini.

"Kami akan memastikan aktiviti itu dapat dibanteras sekali gus dapat mengelak negara daripada terus mengalami kerugian," katanya.



Rabu, 18 Jun 2014

9. 300,000 rakyat Kelantan hidap diabetes

GUA MUSANG 17 Jun - Kira-kira 300,000 daripada 1.5 juta rakyat ne-geri ini menghidap penyakit diabetes.

Pengarah Kesihatan Negeri, Datuk Dr. Ahmad Razin Ahmad Mahir berkata, jumlah penghidap penyakit tersebut amat membimbangkan dan ia harus dikawal dengan kesedaran daripada individu itu sendiri.

Beliau berkata, penyakit tersebut amat berbahaya sekiranya tidak diberikan perhatian yang serius kerana ia membawa kepada pelbagai komplikasi.

"Penyakit diabetis yang tidak terkawal boleh menyebabkan individu itu terdedah kepada komplikasi lain seperti masalah penglihatan yang membawa kepada kebutaan, kegagalan buah pinggang dan serangan jantung," katanya.

"Ramai pesakit diabetes yang berpantang dengan cara mengawal pemakanan, tetapi mereka juga jangan sesekali ketinggalan untuk mengambil ubat dan mematuhi arahan yang diberikan doktor," katanya.

Beliau berkata demikian kepada pemberita semasa majlis Pelancaran Klinik Katarak 1 Malaysia di Klinik Kesihatan Chiku 3, di sini semalam.

Yang turut hadir, Ahli Dewan Undangan Negeri Paloh, Datuk Nozula Mat Diah dan Pegawai Kesihatan Daerah Gua Musang, Dr. Ahmad Faris Awang.

Ahmad Razin berkata, pesakit diabetes diminta supaya tidak berhenti daripada mendapatkan rawatan dan perlu melakukan pemeriksaan kesihatan di hospital berhampiran.

"Pesakit tidak boleh memandang ringan terhadap rawatan yang disifatkan sepanjang hayat itu kerana penyakit tersebut boleh membawa pelbagai komplikasi.

"Penyakit ini berpunca daripada gaya hidup terutama amalan pemakanan yang tidak sihat, kita berharap orang ramai mengambil tentang perkara ini," katanya.

Katanya, sempena kedatangan bulan Ramadan tidak lama lagi, menasihatkan pesakit supaya tidak mengikut nafsu makan dan mengawal cara pemakanan mereka.

"Pesakit harus mengamalkan pemakanan yang seimbang dan melakukan senaman bagi mengekalkan berat badan yang unggul.

"Jangan kita jadikan bulan Ramadan sebagai bulan kita berpesta makan tetapi kita harus mengekalkan kehidupan yang lebih sihat," katanya.



Jumaat, 20 Jun 2014

10. 48 syarikat dilantik bekalkan Netbook 1Malaysia

KUALA LUMPUR 19 Jun - Sebanyak 48 pembekal dilantik oleh Kementerian Komunikasi dan Multimedia bagi membekalkan 400,000 Netbook 1Malaysia kepada guru-guru di seluruh negara.

Menteri Komunikasi dan Multimedia, Datuk Seri Ahmad Shabery Cheek berkata, pemilihan syarikat terbabit ditentukan melalui tender terbuka.

"Kos keseluruhan pemberian Netbook 1Malaysia dianggarkan RM400 juta menggunakan dana Pemberian Perkhidmatan Sejagat (USP)," katanya menjawab soalan Nurul Izzah Anwar (PKR-Lembah Pantai) dalam sidang Dewan Rakyat hari ini.

Menurut Ahmad Shabery, pemberian itu tidak menggunakan wang cukai kerana USP merupakan tabung yang mengumpul enam peratus hasil jualan daripada syarikat-syarikat perkhidmatan telekomunikasi.

"Antara jenama Netbook yang akan diagihkan adalah Lenovo, Samsung, Asus, Acer dan HP," katanya.

Beliau memberitahu, pemberian Netbook kepada para guru dan pelajar merupakan langkah kerajaan untuk melengkapkan teknologi maklumat dan komunikasi (ICT) dalam pembangunan pendidikan.

Menjawab soalan tambahan Nurul Izzah mengenai masalah kerosakan Netbook 1Malaysia yang dibekalkan kepada pelajar, Ahmad Shabery berkata, Kementerian mengambil maklum masalah kualiti berkenaan.

Katanya, kesemua Netbook yang dibekalkan itu mempunyai jaminan selama setahun dan 170 pusat servis disediakan di seluruh negara untuk membaiki kerosakan atau mendapatkan alat ganti.



Ahad, 22 Jun 2014

11. RISDA peruntuk RM54j

PASIR MAS 21 Jun - Pihak Berkuasa Kemajuan Pekebun Kecil Perusahaan Getah (RISDA) Kelantan memperuntukkan lebih RM54 juta untuk program pembangunan pekebun kecil di seluruh negeri sepanjang tahun ini.

Pengaruhnya, Mohamad Ismail berkata, peruntukan tersebut akan disalurkan bagi tujuan program penanaman semula, pengembangan dan pembangunan institusi pekebun kecil di negeri ini.

"Daripada jumlah itu, program penanaman semula menerima peruntukan tertinggi iaitu sebanyak RM34.55 juta, diikuti oleh pembangunan lain-lain berjumlah RM17.78 juta dan selebihnya, diperuntukkan untuk membangunkan institusi pekebun kecil.

"Oleh itu, saya berharap pekebun-pekebun kecil yang menerima bantuan ini dapat memanfaatkannya sebaik mungkin bagi meningkatkan lagi taraf ekonomi masing-masing," katanya.

Beliau berkata demikian kepada pemberita pada Program Pengukuhan Amalan Pertanian Baik (GAP) Peringkat Negeri Kelantan di Tanam Semula Berkelompok (TBS), Bukit Perah, Tok Uban di sini hari ini.

Perasmian majlis tersebut disempurnakan oleh Pengarah Penyelaras GAP RISDA, Mad Jais Che Yem.

Mohamad memberitahu, terdapat seramai 47,812 pekebun kecil yang berdaftar dengan pihaknya melibatkan kawasan tanaman seluas 97,766 hektar di negeri ini.

Katanya, jumlah tersebut melibatkan lima kawasan antaranya Kelantan Utara, Tanah Merah, Machang, Kuala Krai, Gua Musang dan Jeli.

Dalam perkembangan lain, Mohamed berkata, program GAP yang dibuat itu adalah sebahagian pendekatan yang diperkenalkan bagi meningkatkan jumlah pendapatan pekebun-pekebun kecil.

Katanya, melalui pendekatan itu juga pihaknya mahu para pekebun kecil di dedahkan dengan cara tanaman, pembajaan serta sistem penorehan yang lebih teratur dan betul.



Ahad, 22 Jun 2014

12. Aset Maritim perlu ditambah

PUTRAJAYA 24 Jun - Penambahan aset operasi dan anggota akan dapat meningkatkan keupayaan serta kecekapan Agensi Penguatkuasaan Maritim Malaysia (Maritim Malaysia) dalam menguatkuasakan undang-undang laut di negara ini.

Sehingga kini agensi itu memiliki 77 buah kapal peronda, 162 bot laju pelbagai kelas dan lapan unit pesawat udara bagi menggalas tugas rondaan serta pengoperasian melibatkan zon maritim negara yang berkeluasan 614,000 kilometer persegi, namun kira-kira 62 peratus daripadanya berusia melebihi 30 tahun.

Timbalan Ketua Pengarah (Operasi) Maritim Malaysia, Laksamana Madya Maritim Datuk Ahmad Puzi Ab. Kahar berkata, jumlah keanggotaan Maritim Malaysia pada masa ini pula ialah kira-kira 5,000 orang dengan agensi penguatkuasaan berkenaan menyasarkan untuk memiliki 10,500 anggota menjelang 2020.

"Keluasan kawasan perairan negara adalah dua kali ganda daripada darat. Melihat daripada segi itu, kita perlu maju ke hadapan dengan menambah atau menggantikan aset-aset usang dan meningkatkan jumlah keanggotaan bagi mengukuhkan keberkesanan pelaksanaan tugas, katanya ketika ditemui di sini.

Menurut Ahmad Puzi, sebagai agensi tunggal penguatkuasaan di perairan negara, kerajaan memutuskan agensi-agensi lain menyerahkan kapal, bot, jeti dan pangkalan kepada Maritim Malaysia bagi tujuan penguatkuasaan.

Beliau berkata, mengikut piawaian antarabangsa, aset-aset lama sudah tidak ekonomi dan sesuai digunakan bagi tujuan pengoperasian manakala kebanyakannya aset yang diterima agensi tu perlu dibaik pulih berikutan mengalami kerosakan di bahagian-bahagian tertentu.

"Maritim Malaysia mempunyai 77 kapal, namun satu perkara perlu diakui bahawa kebanyakannya aset tersebut telah berusia kerana kita menerima aset yang telah lama digunakan. Kapal paling baharu disumbangkan oleh kerajaan Jepun enam tahun lalu.

"Generasi pada masa ini memerlukan aset yang boleh dijadikan sebagai tempat bekerja yang selari dengan peredaran masa.

Kapal-kapal ini mesti sesuai untuk kegunaan anggota bagi mengharungi pelbagai cabaran getir ketika menjalankan tugas di perairan negara yang amat strategik untuk aktiviti perdagangan sekali gus menyebabkan perlakuan jenayah merentasi sempadan boleh berlaku pada bila-bila masa, ujar beliau.

Ahmad Puzi berkata, cabaran lain yang dihadapi agensi berkenaan ialah tidak mempunyai ibu pejabat pusat, pejabat wilayah dan jeti sendiri sebaliknya menyewa atau menumpang kemudahan daripada agensi lain.

Beliau menegaskan, meskipun Maritim Malaysia terpaksa mengharungi pelbagai kerumitan namun ia bukan penghalang bagi anggota agensi tersebut menjalankan tugas dengan kental menerusi kemampuan yang ada dan menerimanya sebagai satu cabaran.

"Peranan Maritim Malaysia dalam menjaga perairan negara juga diiktiraf di peringkat antarabangsa apabila menerima anugerah Agensi Keselamatan Maritim Terbaik 2009 dari Frost & Sullivan di Singapura dan International Quality Summit Award for Excellence and Business Prestige dari Business Initiative Directions di New York pada 28 Mei 2012,katanya.

Dalam pada itu, beliau berkata, usaha untuk membanteras kegiatan haram seperti penyeludupan diesel bersubsidi menerusi perairan negara akan lebih berkesan jika ia dikekang awal semasa di daratan.

Agensi-agensi yang terlibat perlu meningkatkan kerjasama untuk mencegah di peringkat awal kerana ia lebih berkesan berbanding apabila sudah memasuki perairan negara yang luas,katanya.



Selasa, 24 Jun 2014

13. Pesara Kaya: Syor tubuh unit khas di SPRM

KUALA LUMPUR 24 Jun - Pertubuhan Pribumi Perkasa Malaysia (Perkasa) mencadangkan supaya Suruhanjaya Pencegahan Rasuah Malaysia (SPRM) menubuhkan satu unit khas untuk menyiasat bekas pegawai tinggi kerajaan yang hidup mewah selepas persaraan kerana mereka mungkin terlibat dengan amalan rasuah.

Presidennya, Datuk Ibrahim Ali berkata, penubuhan unit itu bertujuan menjelaki golongan berkenaan supaya siasatan dan tindakan dapat diambil sekali gus mengelakkan mereka terlepas daripada dakwaan rasuah.

"Kita tengok ada pegawai tinggi kerajaan hidup mewah melampaui gaji yang diperoleh selepas persaraan. Persoalannya bagaimanakah mereka ini mengumpul harta itu?.

"SPRM perlu memikirkan bagaimana hendak menangani perkara ini. Sepatutnya kena ada satu unit di suruhanjaya itu untuk menjelaki mereka. Kaedahnya terserah kepada kerajaan, kalau perlu gubal sahaja undang-undang," katanya.

Beliau berkata demikian kepada pemberita selepas menyertai persidangan meja bulat bagi membincangkan dasar kerajaan yang menghalang pelaksanaan agenda pembangunan ekonomi bumiputera anjuran Perkasa di Kelab Sultan Sulaiman, di sini hari ini.

Syor itu merupakan antara resolusi dicapai dalam persidangan berkenaan yang disertai oleh 22 pertubuhan bukan kerajaan (NGO) berkaitan ekonomi bumiputera.

Dalam perkembangan lain, Ibrahim mendesak Malaysia Airport Holdings Berhad (MAHB) supaya mengeluarkan senarai terperinci syarikat bumiputera yang diberi lesen untuk berniaga di kompleks beli-belah gateway@klia2 dan keluasan lot diterima mereka.

Kata beliau, tindakan itu bagi memastikan dakwaan bahawa sejumlah 35 peratus peniaga runcit bumiputera di klia2 sekarang adalah tepat dan mereka menerima layanan adil kerana kemungkinan saiz lot kedai lebih kecil berbanding saiz yang diperoleh peniaga asing.



Selasa, 24 Jun 2014

14. Tujuh syarikat serah cadangan

KUALA LUMPUR 23 Jun - Sebanyak tujuh syarikat telah mengemukakan cadangan program rasionalisasi subsidi minyak kepada kerajaan melalui pelbagai pihak seperti Jabatan Pengangkutan Jalan (JPJ), Unit Perancang Ekonomi (EPU), Kementerian Kewangan dan Kementerian Perdagangan Dalam Negeri, Koperasi dan Kepenggunaan (KPDNKK).

Tujuh syarikat berkenaan termasuk sebuah syarikat berpangkalan di luar negara, sebuah syarikat berkaitan Singapura dan sebuah syarikat yang mempunyai kaitan dengan seorang bekas menteri.

Utusan Malaysia difahamkan, setiap syarikat mengemukakan skim mereka sendiri untuk program rasionalisasi subsidi bahan api dengan matlamat menangani penyalahgunaan subsidi dan meningkatkan kecekapan pelaksanaannya kepada kira-kira 10 juta rakyat Malaysia.

Cadangan sistem dan platform subsidi yang dikemukakan daripada setiap syarikat adalah pelbagai termasuk penggunaan platform seperti MyKad, Kad Pintar, Kad Minyak 1Malaysia, Kad Subsidi, biometrik dan kupon atau tunai.

Setiap platform akan mencetuskan kesan berbeza ke atas perbelanjaan modal dan bayaran pendahuluan yang perlu ditanggung oleh kerajaan antaranya daripada RM200 juta kepada RM1 bilion.

Beberapa syarikat turut mencadangkan kerajaan supaya memberikan mereka hak pemilikan dan kawalan terhadap sistem perkakasan serta pangkalan data program rasionalisasi berkenaan.

Bagaimanapun, sumber yang mendedahkan perkara ini percaya tindakan itu kurang sesuai bagi kerajaan kerana jumlah besar data peribadi sulit yang terlibat.

Pada tahun lalu sebanyak 14.5 bilion liter petrol RON95 digunakan di negara ini namun sebanyak enam bilion liter daripadanya telah disalah guna oleh kenderaan asing dari Thailand, Singapura dan pemilik kenderaan mewah tempatan.

Jawatankuasa Kira-kira Wang Negara (PAC) pada 19 Jun lalu mendedahkan bahawa banyak kelemahan dikesan dalam sistem agihan diesel bersubsidi yang digunakan sekarang sehingga menyebabkan berlaku ketirisan terhadap penggunaannya dan mendatangkan kerugian kepada negara.

Jumlah diesel subsidi yang diberikan kerajaan kepada rakyat meningkat sebanyak 199 peratus dalam tempoh 14 tahun iaitu sebanyak 8.61 bilion liter pada 2013 berbanding 2.873 bilion liter pada tahun 2000.

"Kita mengesyaki ada syarikat bumiputera yang mendapat lebih daripada satu lot dengan menggunakan nama berlainan dan menyewakan kepada orang lain atau mengalibabakan lesen.

"Penjelasan bahawa terdapat 35 peratus peniaga runcit bumiputera di klia2 tidak memuaskan hati sebab di gedung lain yang dibangunkan oleh agensi kerajaan banyak orang ternama yang memperoleh lesen perniagaan dan mereka mengalibabakannya kepada orang lain," katanya



Rabu, 25 Jun 2014

15. 10,007 kes tibi dikesan hingga Mei lalu

KUALA LUMPUR 24 Jun - Sebanyak 10,007 kes penyakit tibi dilaporkan sepanjang tahun ini di seluruh negara sehingga Mei lalu.

Menteri Kesihatan, Datuk Seri Dr. S. Subramaniam berkata, daripada jumlah tersebut, sebanyak 1,439 kes tibi dikesan melibatkan warganegara asing manakala sejumlah 8,568 kes melibatkan warganegara Malaysia.

"Sejak lima tahun kebelakangan ini, kita menyaksikan peningkatan kes tibi pada kadar enam hingga 14 peratus setahun. Malah, kejadian ini dirumitkan lagi dengan kewujudan kes-kes tibi yang kebal (resistan) kepada ubat-ubatan sedia ada.

"Oleh itu, kementerian akan bertanggungjawab menyediakan peruntukan yang mencukupi untuk pembelian ubat-ubatan bagi memastikan pesakit yang kronik dapat dirawat hingga pulih serta mencegah penularan kepada orang ramai," katanya.

Beliau menjawab soalan Senator Datuk Chin Su Phin berkenaan langkah proaktif Kementerian Kesihatan menangani penyakit tibi yang semakin membimbangkan di Dewan Negara hari ini.

Subramiam berkata, kementerian juga giat bekerjasama dengan Jabatan Imigresen dalam usaha membantu mengesan warga asing yang dijangkiti penyakit tibi.

"Sekiranya warga asing itu didapati mempunyai tanda penyakit tibi, permit kerja mereka tidak akan diluluskan dan mereka perlu dihantar balik ke negara asal," katanya.

Tambah beliau, untuk memperkuatkannya pengesanan awal kes tibi kebal, kementerian telah melaksanakan perancangan perolehan peralatan dan kapasiti diagnostik berteknologi tinggi agar pesakit dapat diberi rawatan segera dalam usaha mengawal penularan penyakit tibi jenis ini.

Beliau berkata, pengesanan kes tibi kebal sejak 2004 hingga 2013 adalah dalam lingkungan 0.3 hingga 1.3 peratus berbanding jumlah kes keseluruhan tahunan.



Rabu, 25 Jun 2014

16. Hospital kerajaan kurang 15 doktor pakar

MELAKA 24 Jun - Sekurang-kurangnya 15 doktor pakar diperlukan di hospital kerajaan negeri ini bagi memenuhi penyediaan rawatan yang semakin bertambah di kalangan pesakit.

Pengerusi Jawatankuasa Kesihatan dan Pembangunan Sukan negeri, Datuk Ab. Rahaman Ab. Karim berkata, sehingga kini, Hospital Melaka mempunyai seramai 91 doktor pakar namun jumlah itu dilihat masih belum mencukupi bagi menampung bilangan pesakit termasuk dari daerah Jasin dan Alor Gajah.

Menurutnya, terdapat juga dalam kalangan doktor pakar berkenaan ditugaskan memberi rawatan secara bergilir di hospital-hospital daerah sedangkan keperluan di hospital besar masih tinggi.

"Sehubungan itu, kerajaan negeri telah meminta Kementerian Kesihatan menambah bilangan doktor pakar di negeri ini secepat mungkin bagi mengatasi masalah berkenaan.

"Ini merupakan usaha kerajaan negeri dalam mempertingkatkan mutu perkhidmatan kesihatan seterusnya memberi kemudahan serta keselesaan kepada pesakit untuk mendapatkan rawatan terutamanya bagi kes kecemasan yang memerlukan khidmat pakar," katanya.

Ab. Rahaman (BN-Pantai Kundor) berkata demikian dalam Sidang Kedua Penggal Kedua, Dewan Undangan Negeri (DUN) Melaka Ke-13 di Seri Negeri, Ayer Keroh, di sini hari ini.

Beliau menjawab soalan tambahan Khoo Poay Tiong (DAP-Ayer Keroh) mengenai kekurangan doktor pakar di hospital kerajaan hingga menyebabkan ramai pesakit terpaksa menunggu lama untuk mendapatkan rawatan.

Jelas Ab. Rahaman, beliau memahamikekangan dan masalah dihadapi kementerian untuk menambah doktor pakar yang mengambil masa yang agak panjang.

"Oleh yang demikian, kerajaan negeri tidak mempunyai kuasa untuk menyelesaikan masalah doktor pakar ini dan jalan terbaik yang boleh dilakukan hanyalah dengan meminta kementerian mempercepatkan permohonan itu," jelasnya.

Bagaimanapun, katanya, pesakit yang berkemampuan mempunyai pilihan untuk mendapatkan rawatan pakar di hospital swasta di negeri ini seperti Hospital Pakar Putra, Hospital Pantai dan Hospital Mahkota.

"Walaupun bayaran dikenakan lebih sedikit berbanding hospital kerajaan, namun doktor pakar di hospital swasta mampu memberi rawatan terbaik sama seperti di hospital kerajaan," ujarnya.

Sementara itu, ketika menjawab soalan lisan Lim Jak Wong (DAP-Bachang) berkenaan jumlah doktor sedia ada di negeri ini jelas Ab. Rahaman, sehingga kini Melaka mempunyai seramai 766 doktor termasuk doktor pakar bagi merawat lebih 520,000 pesakit dengan nisbah 1:680.



Khamis, 26 Jun 2014

17. RM11 juta baki nilai kad Touch N Go dipulangkan

KUALA LUMPUR 25 Jun - Sebanyak RM11 juta baki nilai kad Touch N Go dipulangkan kepada para pelanggan yang membuat tuntutan dari 2006 hingga 2013.

Timbalan Menteri Kerja Raya, Datuk Rosnah Abdul Rashid Shirlin berkata, jumlah itu meliputi 158,000 aduan kehilangan atau kerosakan kad yang diterima syarikat pembayaran mikro, Touch N Go Sdn. Bhd (TNGSB).

"Untuk kes baki nilai kad Touch N Go yang tidak dituntut bagi tempoh yang sama, terdapat hampir 55,000 kad dengan nilai keseluruhan dana terkumpul RM2.9 juta.

"Wang ini kemudian diserahkan kepada kerajaan selaras dengan peruntukan seksyen (10) 1 Akta Wang Tak Dituntut 1965 (Pindaan 2002)," katanya.

Beliau menjawab soalan Senator S. Bagiam mengenai jumlah kutipan kad Touch N Go yang tidak digunakan akibat kehilangan dalam sidang Dewan Negara hari ini.

Sementara itu, Rosnah berkata, sehingga 31 Mei lalu, 15.7 juta kad Touch N Go dikeluarkan sejak diperkenalkan pada 1997.

"Daripada jumlah tersebut, dianggarkan 7.9 juta kad masih aktif digunakan manakala bakinya sebanyak 7.8 juta kad dikategorikan sebagai kad tidak aktif," katanya.

Beliau berkata, kementeriannya juga berusaha menambah baik perkhidmatan kad tersebut bagi menggalakkan ramai rakyat menggunakan sistem pembayaran elektronik dalam mengurangkan kesesakan di plaza tol.



Jumaat, 27 Jun 2014

18. Kenapa pemberong tidak diaudit?

MUNGKIN bagi sesetengah pihak, sikap proaktif Kementerian Perdagangan Dalam Negeri, Koperasi dan Kepenggunaan (KPDNKK) dalam membanteras penyalahgunaan dan penyelewengan diesel bersubsidi harus dipuji, apatah lagi dengan kejayaan mematahkan perbuatan itu melalui Ops Titik.

Tetapi persoalannya, apakah ia benar-benar mampu membanteras perbuatan haram tersebut dan apa kesudahannya terhadap sebahagian besar pemberong-pemberong yang sebelum ini dikenalpasti terlibat dalam sindiket menyeleweng diesel bersubsidi.

Kali ini Wartawan Utusan Malaysia, ZULKIFLEE BAKAR, MOHD.SHARIZA ABDULLAH dan SITI ROHAIZAH ZAINAL mendedahkan pula, persoalan pokok yang sepatutnya diberikan tumpuan oleh KPDNKK dalam usaha memastikan usaha membanteras perbuatan yang dianggap sabotaj kepada ekonomi negara itu benar-benar berjaya.

KUALA LUMPUR 26 Jun - Walaupun Kementerian Perdagangan Dalam Negeri, Koperasi dan Kepenggunaan (KPDNKK) dilihat aktif untuk membanteras penyalahgunaan dan penyelewangan diesel bersubsidi namun kementerian tersebut dilihat masih belum menyentuh isu pokok yang memungkinkan gejala itu berlaku.

Satu sumber berkata, sehingga ke hari ini KPDNKK dilihat masih belum melakukan sebarang pengauditan terhadap pemberong-pemberong yang sebelum ini didakwa sebahagian besar daripada mereka terlibat dalam sindiket penyelewangan bahan bakar tersebut.

"Kita masih ternanti-nanti tindakan KPDNKK terhadap golongan tersebut tetapi sehingga ke hari ini, kementerian itu dilihat lebih menumpukan kepada masalah remeh temeh dan bukannya persoalan pokok iaitu mengaudit semua pemberong berlesen dan syarikat yang diberi permit.

"Walaupun persoalan ini pernah ini ditimbulkan tetapi kita lihat tiada tindakan dilakukan oleh kementerian tersebut," kata sumber itu kepada Utusan Malaysia.

Malah sumber berkenaan berkata, penyelewengan diesel bersubsidi tidak akan dapat dihapuskan, kalau sekadar KPDNKK membekukan lesen tanpa membuat penilaian semula terhadap kesemua lesen yang diberikan kepada pemberong.

"Saya tidak faham kenapakah KPDNKK sukar sangat hendak melakukan pengauditan tersebut, kalau tidak ada tenaga, mereka boleh meminta kepada kerajaan untuk membenarkan satu pasukan petugas khas ditubuhkan," katanya.

Sumber itu berkata, pengauditan tersebut amat penting bagi mengelakkan pemberong yang tidak bertanggungjawab terus melakukan penyelewangan diesel bersubsidi.

"Kita tahu sebahagian besar daripada mereka terlibat tetapi selagi pengauditan tidak dilakukan selagi itulah mereka yang selama ini sudah mengaut keuntungan berjuta-juta ringgit melalui aktiviti haram itu akan bebas daripada perbuatan jenayah tersebut," katanya.

Oleh itu, sumber tersebut mengingatkan, kementerian itu tidak perlu beria-ia hendak memperkenalkan sistem baru yang dikatakan akan mampu mengekang penyelewangan diesel bersubsidi sedangkan sistem dalaman sendiri masih berkeceramuk.

"Kenapa perlu tumpu kepada pelaksanaan sistem yang akan menelan belanja beratus-ratus juta ringgit sedangkan sistem pengurusan dalaman berkaitan pengagihan dan pemberian lesen pun masih banyak masalah," katanya.

Sumber itu juga menarik perhatian bagaimana sehingga ke hari ini KPDNKK melalui Ops Titik hanya mampu menumpaskan sindiket-sindiket kecil sahaja.

"Kita tertanya-tanya kenapakah sindiket besar masih lagi beroperasi, saya percaya kementerian tersebut mempunyai maklumat berkenaan," kata sumber itu.



Sabtu, 28 Jun 2014

19. Penempatan guru Bahasa Cina sebagai bahasa pilihan berdasarkan keperluan mendesak - Kementerian

KUALA LUMPUR 28 Jun - Pelaksanaan penempatan membabitkan guru Bahasa Cina bagi subjek pilihan oleh Kementerian Pendidikan adalah berdasarkan keperluan mendesak di Sekolah Kebangsaan.

Menurut kenyataan pejabat Ketua Pengarah Pendidikan hari ini, langkah itu bagi mengelak kelewatan lanjut dalam pelaksanaan program Bahasa Cina yang berlaku sejak Mac lepas.

Kenyataan itu dikeluarkan bagi memperjelas isu yang dibangkitkan Timbalan Presiden MCA, Datuk Dr Wee Ka Siong pada Rabu lepas berhubung dilema 51 guru Bahasa Cina bagi subjek pilihan dari Universiti Pendidikan Sultan Idris (UPSI) yang gagal mendapat tempat di sekolah menengah untuk mengajar Mandarin peringkat Sijil Pelajaran Malaysia (SPM).

Ka Siong yang juga Menteri di Jabatan Perdana Menteri, berkata sebaliknya mereka dihantar ke Sekolah Berasrama Penuh (SBP), sekolah dan kolej vokasional untuk mengajar asas Bahasa Cina.

Kenyataan itu menyebut 130 guru Bahasa Cina bagi subjek pilihan dari UPSI telahpun dilantik oleh Suruhanjaya Perkhidmatan Awam dan akan mengisi kekosongan di Sekolah Menengah Kebangsaan (SMK) yang terdiri daripada Sekolah Menengah Jenis Kebangsaan (SMJK), Sekolah Menengah Kebangsaan Agama (SMKA), Sekolah Menengah Teknik (SMT), SBP, Sekolah Sukan, Sekolah Seni, Sekolah Model Khas, Sekolah Agama Bantuan Kerajaan (SABK) dan Kolej Vokasional pada 1 Julai.

``Kesemua guru terbabit ditempatkan di SBP serta Kolej Vokasional dan mereka akan mengajar subjek pilihan bahasa antarabangsa, yang merupakan satu kertas di bawah SPM untuk SBP, dan mata pelajaran wajib lulus di Kolej Vokasional bagi membolehkan pelajar menerima diploma selepas mengikuti pengajian kursus selama empat tahun," katanya.

Kementerian Pendidikan menyatakan pelaksanaan penempatan itu, yang berkuat kuasa 1 Julai ini, telahpun mengambil kira syarat keseluruhan guru Bahasa Cina bagi subjek pilihan di Sekolah Kebangsaan di seluruh negara.

Kenyataan itu juga menyebut tambahan 77 guru Bahasa Cina bagi subjek pilihan akan ditempatkan di Sekolah Jenis Kebangsaan Cina untuk mengisi kekosongan sedia ada. - BERNAMA



Sabtu, 28 Jun 2014

20. Audit berterusan kekan penyelewengan diesel

KUALA LUMPUR 27 Jun - Kementerian Perdagangan Dalam Negeri, Koperasi dan Kepenggunaan (KPDNKK) menjalankan audit berterusan ke atas pemberong diesel bagi mengelakkan mereka yang tidak bertanggungjawab melakukan aktiviti penyelewengan bahan api bersubsidi di negara ini.

Menteri Perdagangan Dalam Negeri, Koperasi dan Kepenggunaan, Datuk Seri Hasan Malek berkata, sebagai contoh pada tahun lalu, sebanyak 26 tindakan undang-undang dikenakan ke atas pemberong berhubung kesalahan melibatkan diesel bersubsidi.

Kata beliau, daripada jumlah tersebut, 19 tindakan adalah hasil pengauditan ke atas pemberong manakala beberapa kes pada tahun ini yang dilakukan oleh kementerian itu menerusi Pasukan Petugas Khas Jabatan Peguam Negara turut melibatkan kerja-kerja pengauditan terhadap sindiket sebelum tangkapan dibuat.

"Pengauditan bukan sahaja tertumpu kepada pemberong tetapi merangkumi stesen-stesen minyak dan juga pemegang kad fleet yang menikmati diesel dengan harga subsidi," katanya dalam satu kenyataan di sini hari ini.

Beliau mengulas persoalan ditimbulkan oleh Utusan Malaysia hari ini iaitu apakah sikap proaktif KPDNKK benar-benar mampu membanteras penyalahgunaan dan penyelewengan diesel bersubsidi serta apa kesudahannya terhadap sebahagian besar pemberong-pemberong yang sebelum ini dikenal pasti terlibat dalam sindiket menyeleweng bahan api itu.

Menurut Hasan, KPDNKK turut melakukan pemeriksaan berterusan terhadap aktiviti bunkering iaitu penyaluran minyak ke kapal di seluruh negara dengan beberapa kes dijalankan oleh kementerian itu yang melibatkan rampasan kapal dan diesel dalam kuantiti besar adalah membabitkan kegiatan berkenaan.

Beliau berkata, arahan terbaru yang dikeluarkan untuk membatalkan lesen borong aktiviti bunkering di jeti-jeti persendirian juga adalah hasil daripada maklumat risikan dan pemeriksaan ke atas pelesen bunkering berkenaan.

Selain daripada pemeriksaan fizikal, kata beliau, kementerian tersebut turut berkongsi maklumat dengan beberapa agensi-agensi penguatkuasaan lain terutamanya Jabatan Kastam.

"Buat masa ini, KPDNKK sedang bekerjasama dengan Jabatan Kastam untuk menyediakan prosedur operasi standard (SOP) yang lebih ketat berhubung aktiviti bunkering bagi membanteras kegiatan mengeksport diesel bersubsidi ke luar negara atau ke kapal-kapal asing di perairan," katanya.



Isnin, 30 Jun 2014

21. Denggi: Kesedaran rendah

KUALA LUMPUR 29 Jun - Kegagalan institusi kejiranan dalam kalangan masyarakat bandar menyebabkan aktiviti gotong-royong membersihkan kawasan perumahan daripada penempatan nyamuk Aedes tidak mendapat sambutan.

Mengakui perkara itu, Ketua Pengarah Kesihatan, Datuk Dr. Noor Hisham Abdullah berkata, kegagalan tersebut disusuli dengan kesedaran orang ramai mengenai wabak denggi yang masih rendah menyebabkan tiada kesungguhan untuk mereka bersama-sama membersihkan rumah, kawasan persekitaran dan kejiranan.

Menurut beliau, kegagalan menghapus kawasan pembiakan Aedes merupakan punca utama peningkatan kes demam denggi di seluruh negara malah, lebih menggerunkan apabila sebanyak 82 kematian telah direkodkan untuk enam bulan pertama tahun ini berbanding hanya 25 kematian pada tempoh sama tahun lalu.

Perkara ini terjadi di kawasan bandar dan kempen Komunikasi Untuk Perubahan Tingkah Laku (Combi) yang dijalankan Kementerian Kesihatan mendapati kes denggi dapat dikawal jika ada kerjasama daripada penduduk sesuatu kawasan untuk membasmi tempat kediaman nyamuk Aedes.

Kesedaran memang ada tetapi kurang daripada segi tindakan bersama (gotong-royong) oleh masyarakat. Gotong-royong itu sangat bagus namun aktiviti itu tidak boleh hanya sekali sebaliknya perlu berterusan," katanya ketika dihubungi di sini hari ini.

Utusan Malaysia semalam melaporkan situasi semasa demam denggi di negara ini dengan statistik menunjukkan empat kematian direkodkan sepanjang minggu lalu menjadikan jumlah keseluruhan sebanyak 82 mangsa iaitu peningkatan 228 peratus sehingga Jun tahun ini berbanding Jun 2013.

Menteri Kesihatan, Datuk Seri S. Subramaniam dilaporkan berkata, keadaan amat meruncing apabila 2,021 kes baharu demam denggi dilaporkan hanya dalam tempoh tujuh hari iaitu bermula 15 hingga 21 Julai lalu.

Jumlah kes tertinggi direkodkan adalah di Selangor khususnya daerah Petaling dengan kebanyakannya berlaku di kawasan perumahan antaranya Ara Damansara, Apartmen Perdana Seksyen 13, Kelana Puteri Kondo dan Kondo Eksklusif Perdana di PJU8.

Menurut Dr. Noor Hisham, kementerian bersedia membuka klinik kesihatan berhampiran hospital pada bila-bila masa untuk menguruskan kes-kes baharu demam denggi sekiranya berlaku peningkatan mendadak selepas ini.

Pada asasnya, dua langkah utama diambil sepanjang masa iaitu langkah pencegahan di tempat pembiakan nyamuk Aedes melalui semburan (fogging) serta pelbagai lagi dan langkah perlindungan daripada digigit nyamuk," katanya.